

Dithero tsa Tirelano mo Kutlwanong

52/2014 Ka Sontaga 18 morago ga moletlo wa Modimo o o Borarobongwe, e le ka 19. 10. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

Lefoko le le okamelang beke eno le kwadilwe mo go 1 Joh. 4:21, le re: **"Taolo e re e amogetse mo go ona e e reng: Yo o ratang Modimo a a rate le mowa-Rraagwe."**

1. Sefela sa - - 267/273

2. Thapelo: Morena Modimo Rara yo o mo legodimong, re a go leboga, ka o sa lape go re kaela, le go re tlhotlheletsa gore re utlwe Lefoko la gago, re be re le amogele ka tebogo. Ke gona re go kopang gore Mowa o o Boitshepo o dire mo go rona, re tle re tlhokomele ka fa re tshelang ka teng, re dirise nako ka tshwanelo, re tthaloganye se e leng go rata ga gago, re tlale ka Mowa ka metlha, re buisanye ka Lefoko la gago, re go opelele, re go dudueletse, re be re ikokobeletsanye ka go boifa Keresete. O re bope gore re nne ba gago ka mmele, le ka mowa, ka tthaloganyo, le ka maikutlo otlhe ka ene Jesu Keresete, Morena, Mopholosi wa rona. Amen.

3. Lefoko la Testamente e kgologolo le kwadilwe mo go Ekesodu 20:1-17;

Epistolo ka fa thulaganyong ya 2 e kwadilwe mo go Baroma 14:17-19;

Efangele ka fa thulaganyong ya 1 e kwadilwe mo go Mareko 12:28-34.

4. A go ipolelwe tumelo ya bokeresete!

5. Sefela sa 285 - 268/275

6. Thapelo ya mmadi wa thero.

7. Epistolo ka fa thulaganyong ya 6 e kwadilwe mo go Baefeso 5:15-21, e re: "Tlhokomelang thata he ka fa lo tshelang ka teng, e seng jaaka masilo, mme e nne jaaka matlhale; lo dirise nako ka tshwanelo, gonne malatsi a bosula. Ka moo he, se nneng bosilo, mme tthaloganyang se e leng go rata ga Morena. Se tagweng ke bojalwa, ka botlhaswa bo tswa mo go jona; mme tllang Mowa; lo buisanye ka dipesalome le difela tsa pako le dikopelo tsa mowa, lo opelele Morena, lo mo dudueletse ka dipelo tsa

lona, lo leboge Modimo Rraetsho ka gale ka ntlha ya tsotlhe mo leineng la Morena wa rona Jesu Keresete, lo ikokobeletsanye ka go boifa Keresete." Amen.

8. Thero: Barategi mo Moreneng wa rona Jesu Keresete, Lefoko la Modimo, fa le bua le rona, le rata go re bolelela gore se se re kgalemelang ke go reng? Ka metlha le bua ka ditsela tse pedi, jaaka rona, fa re bua, re bua jalo, re re: Ka tsela e ga go tsamaiwe, gonne e na le tau, e na le kotsi. Ka tsela e nngwe go a tsamaiwa, gonne ga go na sepe mo go yona se se bolayang. Go ntse fela jalo ka fa thatong ya Modimo. Re utlwa tse pedi. Ka taolo nngwe le nngwe ya Modimo re utlwa se re tshwanetseng go se tlogela, le se re tshwanetseng go se dira. Go ntse fela jalo ka kaelo ya kajeno. uPawulu o re ruta thato ya Modimo, a re: **Tlhaloganyang se Morena a se ratang!**

1. Lo dirise nako ka tshwanelo!

2. Lo tlale Mowa!

1. Dirisang nako ka tshwanelo! Re ka botsa gore thato ya Modimo e reng? Karabo ya ntlha e re: Dirisang nako ka tshwanelo! Ka go dira molemo re dirisa nako ka tshwanelo. Ka go rialo Morena o rata gore re tlhokomele thata ka fa re tshelang ka teng, e seng jaaka masilo, mme re nne jaaka matlhale. Re tla tsamaya jang re le matlhale? Moapostolo o a tshwaya, a re: Se tagweng ke bojalwa, ka botlhaswa bo tswa mo go jona. Go ntse jang mo nakong ya kajeno?

Paulo o tshwaya mofuta o le mongwe fela wa seno, mme kajeno mefuta-futa ya dino, ya majalwa ga e tihole ya balwa, e mentsi fela. Kwa dijanaga di laisang batho teng, kwa dibuse di emeng teng o bona diphafana tse di latlhlweng, tsa dimpampiri tse ditshweu, mme go kwadilwe ka mebala e mehibidu mo go tsona. Go a nowa, go a hupiwa, go a tagwa. Nako ya rona e bosula. Ga re dirise nako ya rona ka tshwanelo. Go ne go le botoka ka nako ya moapostolo, e bile go ne go le botoka ka nako ya bagolo ba rona, gonne ga nowa ke banna ba bagolo fela. Mme kajeno basimanyana le basetsanyana ba a hupa, ba a tagwa.

Go tagwa ke boleo jo bo maswe. Go senya boemo jwa motho, go senya le tlhaloganyo ya gagwe. E bile go itsiwe gore maleo a le mantsi a mangwe a bona phatlha gore a laole motho ka ntlha ya botagwa. Motho o fetoga go nna sebata ka ntlha ya go tagwa. Botlhaswa bo tswa mo bojalweng. Fa motho a tagwa, ga a tihole a itshwara, o

tshwarwa ke dikeletso tsa pelo ya gagwe, o ineela mo go tse di bosula fela. Tseo ga di utlwane le thato ya Modimo. Ga se thato ya ona. Kgaogana le tsona, o di tlogele, o dirise nako ya gago ka tshwanelo! O filwe nako gore o dire molemo. O di dire! Tlhokomela tsa kwa gae, le tsa kereke, le tsa motse le toropo ya gago! Thusa kwa go tlhokegang teng! Lekola batlalelwi, le balwetsi! Biletsa ba ba iseng ba tlabologe mo tlabologong, o ba laletse gore ba tsene kereke le wena!

2. Lo tlaleng Mowa! Go tagwa ke bojalwa ga go tsamaelane le go tla Mowa. Go nyatsa tse re di diretsweng ke Keresete. Ka moo latlang tsele, lo tlaleng Mowa! Lefoko le re: Lo buisanye ka dipesalome le difela tsa pako le dikopelo tsa mowa, lo opelele Morena, lo mo duduetse ka dipelo tsa lona. Re dirise Lefoko la Modimo. Fa re le tlhokomela, re tla lemoga ka pele, fa le sa godise motho, gongwe morafe mongwe, mme le golegela tsotlhe mo boleong. Le ruta gore botlhe ke baleofi, ba tshwanetswe ke tathego.

Fela fa re tla Mowa, re tla phologa. Mowa o re sedifatse gore re lemoge bopelotlhomogi jo bo mo Moreneng, mo mading a Kwana ya Modimo, re tle re rutane ka Lefoko la Morena, re laole mo botshelong jwa rona, re le tshaloganye. Ke taolo ya Morena, ke go rata ga gagwe. Mme a go dirafala mo go rona? A re tla Mowa, a re buisanya ka Lefoko la Morena? Kana kgethololo ka ntlha ya tsa lefatshe e tswa kae? Re tshwanetse go buisanya le ba lefatshe, re ba gakolole, mme re se itsenye mo dikgannyeng tsa bone.

Rona badumedi a re ithuteng go ikokobeletsana, ka Jesu a bua, a re: Puso ya me ga se ya lefatshe leno. Go rata ga Modimo ke gore re tlabologe, re pholosiwe, re ipolele dibe tsa rona, re ipobole, re kope boitshwarelo mo leineng la ga Jesu. A re yeng go Jesu kajeno mmogo le maleo a rona, ona a go tagwa, a go boifa go buisanya le ba bangwe ka ga Lefoko la Modimo, a go tshwakgafala mo dithutong tsa go ithuta Lefoko la Modimo, a go tshwakgafala le go boifa mo tirong ya go nna basupi ba Morena wa rona Jesu Keresete, re kgaogane le maleo otlhe ao, re itshepisiwe mo go ona ka go itshwarelwa ka ntlha ya ga Jesu Keresete, ka go tla Mowa.

Ke nako ya me le ya gago, jaaka re utlwa Lefoko leo. Ke thato ya Morena gore re ye go Jesu, re batle thuso mo go ene, re solofele mo go ene, re mmitse mo ditlalelong tsotlhe tsa rona, re ye mo go ene, re mmitse, re mo kope, gonne ke boammaaruri jo bo

nnetseng ruri, fa go twe: Ke go rata ga Rre gore mongwe le mongwe yo o bonang Morwa Modimo, a dumele mo go ene, a nne le botshelo jo bo sa khutleng.

A Modimo o re thuse, a tlatse dipelo tsa rona, re tle re lemoge go rata ga ona, re o leboge ka ntlha ya bopelotlhomogi jwa ona mo leineng la ga Morwaaona Jesu Keresete, re ikokobeletsane ka go o boifa, ona o buse mo kerekeng ya rona, o buse mo kerekeng ya lefatshe lotlhe, merafe yotlhe e ikokobeletsane ka go boifa Jesu Keresete, Morena, Morepholosi. Amen.

9. Thapelo: Rara yo o mo legodimong, re a go leboga, ka o re file Lefoko la gago. Re kopa mo go wena gore o re dire matlhale ka Morwao yo o rategang. Ka ntlha ya gagwe re lebogela bopelotlhomogi jwa gago. O re bolokele Lefoko la gago, o re romele ka metlha badiredi ba Lefoko gore ba rere Lefoko ka bopelokgale jotlhe, ba tsamaye mo boammaaruring jwa gago, ba ganetse thero ya maaka. Tshegofatsa seminare sa rona sa kwa Tshwane, o sedifatse ba ba rutang le ba ba ithutang teng. Thobo ke e kgolo, mme badiri ba tlaetse. Romela badiri mo thobong ya gago! A Lefoko la gago le taboge, le tsene mo mafatsheng otlhe, puso ya gago e ate, go senyege puso ya ga Satane. Morena, bowa, tla ka pele, o athole batshedi le baswi. O re utlwe ka ntlha ya bopelotlhomogi jo bogolo jwa gago. Amen. Thapelo ya Morena: Rara wa rona yo o mo legodimong ...

10. Sefela sa 267 - 249/258

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke ke N. A. Ntuli, ka ngwaga wa 1974/2002/2008/2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.